

ANEKS „A“

KRITERIJI ZA PREGLED PREDMETA RATNIH ZLOČINA

Radna grupa za izradu izmjena i dopuna Državne strategije za rad na predmetima ratnih zločina (Radna grupa) prepoznala je potrebu za izmjenom kriterija za pregled i ocjenu složenosti predmeta ratnih zločina s ciljem fleksibiliziranja i usaglašenog tumačenja istih od strane Suda BiH i Tužilaštva BiH, a kako bi se omogućio prenos većeg broja predmeta ratnih zločina sa pravosuđa državnog nivoa na entitetski nivo, odnosno nivo Brčko distrikta BiH.

S tim u vezi, izrađene su izmjene kriterija koji čine sastavni dio izmjena i dopuna Državne strategije za rad na predmetima ratnih zločina i sadržani su u Aneksu „A“ Strategije.

Prilikom izrade ovih Kriterija, u sadržajnom smislu, kao polazna osnova korišteni su kriteriji utvrđeni prvobitnom Strategijom, najbolja praksa uspostavljena pred domaćim sudovima i tužilaštvima, uz konsultovanje prakse Međunarodnog krivičnog suda za bivšu Jugoslaviju i stalnog Međunarodnog krivičnog suda u Hagu.

Ovim Kriterijima utvrđuju se jasno definisane i usaglašene smjernice kojima će se rukovoditi Tužilaštvo BiH i Sud BiH prilikom ponovnog pregleda i nove kategorizacije predmeta ratnih zločina sa ciljem donošenja odluke Suda BiH o tome da li će se predmet, s obzirom na stepen njegove složenosti, procesuirati pred Tužilaštvom BiH i Sudom BiH, ili pred sudovima i tužilaštvima entiteta i Brčko distrikta BiH u skladu sa članovima 27.a i 449. Zakona o krivičnom postupku BiH. Tužilaštvo BiH će primjenjivati ove kriterije za utvrđivanje stepena prioriteta predmeta, odnosno izrade liste prioriteta procesuiranja najsloženijih predmeta, na osnovu kojeg će se određivati redoslijed procesuiranja pred Sudom BiH.

Postoji opredjeljenost da se svi materijalni i kadrovski resursi kojima raspolažu Tužilaštvo BiH i Sud BiH prvenstveno usmjere na procesuiranje najsloženijih predmeta ratnih zločina, čija se složenost utvrđuje u skladu sa ovim Kriterijima, a da se predmeti koji se ocijene kao manje složeni procesuiraju pred sudovima i tužilaštvima entiteta i Brčko distrikta BiH. Primjena ovih kriterija, međutim, ne isključuje mogućnost da se pojedini predmeti, ukoliko postoje izuzetne okolnosti (javna ili službena funkcija učinitelja, potreba za osiguranjem mjera zaštite svjedoka, itd.), procesuiraju pred Tužilaštvom BiH i Sudom BiH, iako bi po stepenu složenosti ti predmeti bili procesuirani pred drugim sudovima i tužilaštvima.

Koristeći navedene kriterije Sud BiH će vršiti pregled složenosti predmeta na prijedlog stranaka ili branitelja ili po službenoj dužnosti, a u svrhu donošenja odluke o ustupanju ili preuzimanju predmeta primjenom odgovarajućih odredbi ZKP-a BiH. Tužilaštvo BiH će prilikom podnošenja Sudu prijedloga za ustupanje ili preuzimanje predmeta koristiti iste kriterije. Također, svi sudovi i tužilaštva će, koristeći ove Kriterije, podnositi prijedlog Sudu BiH za preuzimanje predmeta u skladu sa članom 449. ZKP BiH.

Ukoliko predmet ispunjava dole navedene kriterije u pogledu težine krivičnog djela i svojstva i uloge učinitelja, pojedinačno ili u njihovoj međusobnoj vezi, postupak će se voditi pred Sudom BiH, a u suprotnom će se postupak voditi pred drugim nadležnim

sudom u BiH, a u skladu sa zakonskim odredbama o nadležnosti, ustupanju ili preuzimanju predmeta.

TEŽINA KRIVIČNOG DJELA:

- a) pravna kvalifikacija krivičnog djela (genocid i zločini protiv čovječnosti u svim slučajevima, te krivična djela koja su pravno kvalifikovana kao ratni zločin protiv civilnog stanovništva, ratni zločin protiv ratnih zarobljenika ili ratni zločin protiv ranjenika i bolesnika uz ispunjenje najmanje jednog od ostalih kriterija)
- b) sistematska ubistva
- c) teži oblici silovanja (sistematska silovanja, formiranje zatočeničkih centara sa ciljem seksualnog ropstva)
- d) teži oblici nezakonitog zatvaranja ili drugo teško oduzimanje fizičke slobode (osnivanje, sprovođenje i držanje u logorima i zatočeničkim centrima, uzimajući u obzir masovnost, dužinu ili posebno teške uslove zatvaranja)
- e) teži oblici nanošenja patnje civilnom stanovništvu (masovno granatiranje civilnih objekata, uništavanje religijskih i kulturno-istorijskih spomenika)
- f) povezanost predmeta sa drugim predmetima

SVOJSTVO I ULOGA UČINITELJA U IZVRŠENJU KRIVIČNOG DJELA

- a) formacijska dužnost
- b) rukovodeća funkcija u upravljanju logorima i zatočeničkim centrima
- c) politička/pravosudna funkcija
- d) teži načini i stepeni učešća u izvršenju krivičnog djela (udruženi zločinački poduhvat, komandna odgovornost)